



Sud Bosne i Hercegovine
Суд Босне и Херцеговине

Broj: S1 3 IŽ 048741 24 IŽ
Sarajevo, 02.08.2024.godine

Sud Bosne i Hercegovine u Sarajevu, u apelacionom vijeću sastavljenom od sudija Mirsade Džindo kao predsjednika vijeća, Dinke Bešlagić-Čovrk i Hilme Vučinić, kao članova vijeća, odlučujući o žalbi političke stranke Demokratski savez-Demos Banja Luka iz Banja Luke, Kralja Petra I Karađorđevića 109, izjavljenoj protiv Odluke Centralne izborne komisije Bosne i Hercegovine broj: 05-1-07-5-832/24 od 25.07.2024.godine, o utvrđivanju odgovornosti za vođenje preuranjene izborne, u nejavnoj sjednici, održanoj dana 02.08.2024.godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu utvrđena je odgovornost političke stranke Demokratski savez-Demos Banja Luka iz razloga što je, dana 12.06.2024. godine putem društvene mreže Facebook vodio preuranjenu izbornu kampanju, pa joj je na osnovu člana 6.7 stav 2. tačka 1. Izbornog zakona BiH i primjenom odredbe člana 19.9 stav 1. tačka 3. Izbornog zakona BiH izrečena novčana kazna u iznosu od 4.000,00 KM.

Naloženo je Demokratskom savezu-Demos Banja Luka da sa društvene mreže Facebook ukloni spornu objavu za koju je Centralna izborna komisija BiH izrekla novčanu kaznu, te da politička stranka Demokratski savez-Demos Banja Luka, sve pristalice i kandidate ove političke stranke za predstojeće Lokalne izbore 2024. godine obavijesti da su dužni da se suzdrže od javnog oglašavanja i vođenja izborne kampanje u elektronskom, onlajn i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Protiv navedene odluke žalbu je izjavila politička stranka Demokratski savez-Demos jer Centralna izborna komisija BiH nije pravilno utvrdila sve činjenice i okolnosti i da nije u potpunosti na pravilan način tumačila član 7.1 Izbornog zakona BiH. Sporni sadržaj odnosi se na plan izgradnje dva nebodera u naselju Borik i da je na društvenoj mreži Facebook objavljen nacrt izmjene regulacionog plana. Demos je ukazivao na potrebu izgradnje garaže umjesto nebodera i da je riječ o kontinuiranoj aktivnosti gradskog odbora. Nisu poslate političke poruke koje direktno ili indirektno ukazuju na

kampanju, već ponovljeni stav DEMOSA. Osim toga nije zabranjeno učestvovati na javnoj debati koja je od javnog interesa. Izvršen je samo uvid u štampane materijale, na koji način se nije moglo pravilno utvrditi činjenično stanje. Predlaže da se žalba usvoji i poništi sporna odluka.

U odgovoru na žalbu Centralna izborna komisija Bosne i Hercegovine (u daljem tekstu CIK BiH) je predložila da se žalba odbije kao neosnovana.

Žalba nije osnovana.

Iz stanja spisa proizlazi da je CIK BiH dana 09.07.2024. godine nakon što je putem e-maila zaprimila inicijativu za pokretanje postupka po službenoj dužnosti podnesenu od strane Centra civilnih inicijativa (za Koaliciju „Pod lupom“) da je dana 12.06.2024. godine na facebook stranici političke stranke DEMOS Banja Luka objavljen tekst i video/prilog sa TV-a u kojem je prikazan i predstavljen projekat izgradnje objekta na lokalitetu jednog banjalučkog naselja, a mjestu već planirane izgradnje stambene zgrade, kao dio rješenja koji će politička stranka DEMOS predložiti. Cijeli video prati logo stranke, čime je prekršena odredba člana 7.1 Izbornog zakona Bosne i Hercegovine.

Žalitelj je blagovremeno dostavio izjašnjenja navodeći da se u konkretnom slučaju ne radi o preuranjenoj kampanji, te da se izjava Borana Bosančića, predsjednika gradskog odbora Demos Banja Luka odnosi na nacrt regulacionog plana za naselje Borik u Banjoj Luci, te da su sve strane mogle dostaviti svoje primjedbe u Gradsku upravu Banja Luka. Navedena politička stranka je i prošle godine ukazivala na problem nedostatka parking mjesta u Banjoj Luci i predlagala izgradnju javne garaže i poslovnih prostora kao rješenje istog, pa se radi o kontinuiranoj aktivnosti Gradskog odbora.

Pravilan je zaključak CIK BiH da je došlo do kršenja odredbe člana 7.1 Izbornog zakona BiH jer iz dokaza koji se nalaze u spisu, jasno proizlazi da je politička stranka Demokratski savez-Demos odgovorna što je putem društvene mreže Facebook vodila izbornu kampanju u periodu preuranjene izborne kampanje.

Odredbom člana 7.1 Izbornog zakona BiH propisano je da je u periodu preuranjene izborne kampanje zabranjeno vođenje izborne kampanje u elektronskim, online i štampanim medijima i putem društvenih mreža ili bilo koji oblik javnog oglašavanja kampanje. Ova zabrana ne odnosi se na organizovanje zakonitih zvaničnih skupova organa i događaja političkih subjekata u svrhe koje nisu kampanja.

U članu 1.1a stav 1. tačka 8. Izbornog zakona BiH, propisano je da je „Preuranjena kampanja“ svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje.

Odredbom člana 9. stav 1. Pravilnika o medijskom predstavljanju i javnom oglašavanju političkih subjekata u izbornom periodu („Službeni glasnik BiH“, broj

31/24) propisano je da je u periodu preuranjene kampanje političkim subjektima zabranjen svaki oblik radnje iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Stavom 2. istog člana propisano je da se zabrana iz stava 1. ovog člana odnosi na upoznavanje birača i javnosti sa programom i kandidatima političkih subjekata za predstojeće izbore.

Nije osnovana tvrdnja žalitelja da Centralna izborna komisija nije pravilno i potpuno utvrdila sve činjenice jer iz dijela govora predsjednika gradskog odbora Demos Banja Luka Bosančić Borana proizilazi: „Želimo još jednom iznijeti naš prijedlog koji predstavlja plan izgradnje garažnog prostora na mjestu pijace u naselju Borik. Taj objekat ima tri sprata, 600 garažnih mjesta, dok bi u prizemlju bili prostori predviđeni za zanatske radnje“. I „Demos predlaže da se na ovoj lokaciji izgradi jedna javna garaža gdje bi u prizemlju bili poslovni prostori, a gore tri etaže kako bi se na taj način dobio dovoljan broj parking mjesta oko 600 parking mjesta...“ Iz navedenog teksta nije samo u pitanju komentar na izmjenu regulacionog plana nego se ukazuje na plansko rješenje vezano za izmjene regulacionog plana u naselju Borik i u prvi plan promovira politička stranka Demokratski savez-Demos. Izjava je data pred određenom grupom ljudi i mještana naselja i vlasnika štandova koji potvrđuju da politička stranka Demokratski savez -Demos „ima najbolji prijedlog“, na koji način se promoviše program i ideje za izmjene regulacionog plana. U samom videu vidljiv je i logo političke stranke pa kako je prilog okačen na facebook stanici navedene političke stranke, proizilazi da je vođena izborna kampanja sa ciljem pribavljanja podrške birača i koji jedino može služiti u svrhu promovisanja političke stranke.

Dakle iz provedenih dokaza jasno proizilazi da je politička stranka Demokratski savez-Demos postupila suprotno odredbama člana 7.1 Izbornog zakona BiH, što je u skladu sa odredbom člana 19.9 stav 2. Izbornog zakona BiH.

Stoga je prema shvatanju vijeća Apelacionog odijeljenja Suda BiH pobijana odluka CIK BiH pravilna i zakonita, jer se radi o nedozvoljenoj radnji u smislu člana 19.9 stav 1. tačka 3.i stav 2. Izbornog zakona BiH odnosno da se radi o promociji političke stranke prije zvanične izborne kampanje.

Pravilno je izrečena i visina novčane kazne, cijeneći kao otežavajuću okolnost da je politička stranka Demokratski savez-Demos za isti prekršaj u ovom izbornom ciklusu već ranije kažnjena odlukom od 23.07.2024. godine zbog vođenja preuranjene kampanje. .

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

PREDSJEDNIK VIJEĆA
S U D I J A
Mirsada Džindo